




Literatura den Bon Dia

Ernesto E. Rosenstand



TUR COS A KEDA ATRAS

Juan naturalmente a acepta. Poco poco el a realisa cu no tabatin miho luga pa topa cu na su cas. Maske no tabata port'e unda nan topa kistion nan topa. Y awor cu el a propone na su mes cas tabata hopi mas miho. P'esei el a puntr'e:

- Ki dia y ki ora?
- Diaranson. Och'or! No mester ta ni mucho tempran ni mucho laat.
- Cuant'or? Juan a puntra contento.
- Och'or ta un bon ora?
- Sigur sigur! Lo mi t'ei och'or en punto. Sin falta. Y berdad su diaranson poco prome cu och'or el a para su auto poco leu di e cas di Carmen. E no kier a lanta ningun sorto di sospecho. Y na pia el a cana bai cerca Carmen, cu tabata sper'e ansiosamente.

Na cuminsamento nan no tabata sa con cuminsa. Tur dos tabata muestra poco nervioso. Juan un poco mas decidido. Ma tur dos tabata sa masha bon na unda e presencia di Juan aki lo por hiba nan. No ta por nada Carmen a admiti pa nan topa, anto den su mes cas. E tambe tabata decidido di bai tur loke por.

Carmen tabata warda Juan cuminsa papia y Juan di su banda tabata spera Carmen habri e combersacion. Nan tabata sinta cara pa otro. Den un kietud ehemplar. Ma despues di basta rato cu nan a keda mira otro manera dos straño Juan a puntra:

- Con ta cu bo?
- Ami ta bon, bo no ta mira. Y abo?
- Ami tambe. Hopi tempo sin topa otro.
- Esei ta berdad.
- Anto tur e tempo ei mi tabata pensa riba bo.
- Berdad?
- Manera bo ta tende.
- No bin gaña mi atrobe.
- Mi no ta gaña bo. Esei ta e puro berdad.
- Y abo?
- Pa mi ta franco... de bes en cuando.
- Bo ta felis cu Jacinto?
- Si, pakico?
- No, pa nada.
- Curiosidad di mi parti
- Mi no a spera
- Esei pasobra bo no ta kere cu constantemente mi ta hiba bo den mi curason.

- Contento di tende.
- Ma ami ta duda cu bo ta felis cu Jacinto.
- Di con?
- Pasobra, maske bo tabata hui mi bo ta sinti algo p'ami.
- Mi no ta kere.
- Ma ami sa.
- Di con bo ta asina sigur.
- Pasobra ora mi a propone bo bo a tuma aden pa nos topa... anto aki.
- Bon mira, berdad esei tabata un locura. Esei mi ta realisando awo.
- Un locura o un deseo?
- Con cu bo kier yam'e. Hopi biaha den nan nos no sa tin diferencia.
- Y Jacinto?
- El a bai gym.
- O, e tambe ta bai gym?
- Si!
- Cuanto biaha pa siman?
- Diaranson so.
- Ki ora el a sali?
- Shet.or y mei. Carmen a contesta.
- Ki ora lo e bolbe?
- Pa dies or.
- Bo no tin miedo cu lo e bin tempran.
- E no sa haci esei. Te awor esei nunca tabata e caso. Mi ta spera cu awenochi esei tampoco lo sosode. Si esei tabata e caso lo mi no a bisa bo bin.
- Berdad. Bo tin rason.
- Y lo mas straño cu por zona ma awo cu bo ta cerca mi menos.
- Den lo mas profundo di bo ser bo tabata kier esaki.
- Manera bo ta bisa.
- Bo tabata un continuo nostalgia. Awo mi ta sinti mi trankil. Mi no sa di con, ma asina ta. Apesar di loke cu mi ta haciendo no ta bon.
- Bo tin tur bo rason pa sinti bo trankil, pasobra cerca mi nunca por pasa bo algo. Esei semper mi a purba di splica bo, ma bo no kier a kere mi. Bo a bai tras di rumornan. Neglishando e oportunidad cu nos tabatin pa por ta felis. Semper ami lo percura bon p'abo, pa bo no core ningun peliguer. Den mi brasanan lo bo sinti bo sigur.
- Si, awor mi a haya sa cu bo tabatin rason. Carmen a bisa.
- Lo bo tuma mi pa loco, ma fo'i dia di e fiesta mi no por saca bo for di mi pensamiento. Mi a purba tur manera, ma sin ningun resultado.
- Ami a pasa mi mescos.